

Usa ka Butang Mahitungud sa

Kinabuhi
ug
Kamatayon

R. B. THIEME, JR.

USA KA BUTANG MAHITUNGUD SA
KINABUHI UG KAMATAYON
ANG EBANGHELYO NI JESU-KRISTO

R.B. THIEME, JR.



R.B. THIEME, JR., BIBLE MINISTRIES
HOUSTON, TEXAS

Orihinal nga naimprinta isip *A Matter of Life & Death* niadtong tuig 1990 ni R. B. Thieme, Jr.

Kini nga basahon napatik gikan sa mga pagtulon-an ug mga wala maimprinta nga mga sinulat ni R.B. Thieme, Jr.

Aron sa pag-order niini nga libro sa English, kontaka:
R. B. Thieme, Jr., Bible Ministries
P.O. Box 460829, Houston, Texas 77056-8829
www rbthieme org

Walay kabahin niining publikasyon nga ipasanay o ipadala sa lainlaing porma o paagi, elektroniko o mekanikal, lakip na ang seroks, rekord, o uban pang mga pamaagi sa pagkopya, nga walay nakasulat nga pagtugot gikan sa tigmantala.

Ang Kasulatan gikuha gikan sa *A Matter of Life & Death* nga libro mismo og gihubad sa Binisaya.

Napatik sa Tagbilaran City, Bohol, Philippines.

Hinubad ngadto sa Binisaya nga pinulongan ni Jerome L. Salutan. Gireview nila ni Raflyn H. Salutan, Ph.D. ug Elina C. Vicoy. Pinatik nga may pagtugot sa R.B. Thieme, Jr., Bible Ministries.

USA KA BUTANG MAHITUNGUD SA
KINABUHI UG KAMATAYON

Kini nga libro giandam para sa pagpatik gikan sa mga gitudlo ug wala namantalang mga sinulat ni R. B. Thieme, Jr.

Ang Kasulatan gikutlo gikan sa *A Matter of Life & Death* nga libro mismo. Ang sinanggaang komentaryo mipakita sa mga gipanudlong Bibliyahanong klase o milambigit sa mga gikutlo diha sa kasamtangang gihisgutan.

GITOOHAN NGA MASALAYPON

PAGHUNAHUNA SA MAKADIYUT nga ikaw naglingkod sa hukmanan. Ikaw nag-atubang sa kaso nga pagpatay, usa ka krimen nga nagdala sa silot nga kamatayon. Ang ebidensya batok kanimo gitunol na ngadto sa grupo sa maghuhukum ug ang imong abogado mipresentar na usab sa imong depensa. Karon naghulat ka nalang sa hukum sa grupo sa maghuhukum.

Usa ka kahilum gayud ang naghari sa palibot sa hukmanan sa dihang ang hepe sa grupo sa maghuhukum milakang paabante. Ikaw mibarog ug miatubang sa huwes. Ikaw nasayud sa usa ka kamatuuran nga walay

bisan usa diha sa hukmanan nga tinong nasayud: Nga imong nabuhat ang krimen. Sa dihang ang hepe sa grupo sa maghuhukum gianunsyo ang hukum nga sad-an, ikaw wala mahikurat.

Ang huwes midukduk sa malyete ug misaysay sa imong sentensya. Ikaw dili na makaipsut sa silot ug ang imong manlalaban dili makapanalipod kanimo. Ikaw walay mahimo aron pagluwas sa imong-kaugalingon.

Apan sa dihang ikaw gidala palayo gikan sa hukmanan nga nakaposas, may usa ka tawo nga naglakaw paduul. Kining tawhana usa ka estranghero para kanimo. “Ako ang mupuli sa imong silot,” siya nag-ingon. “Ako ang mamahimo nga imong halili.”

Ang huwes paabanteng nagyakbo aron sa pagpangutana kaniya. Sa katapusan, natagbaw pinaagi sa mga kuwalipikasyon sa maong tawo, iyang gidawat ang estranghero isip imong halili. Ang mga posas gitangtang gikan sa imong mga kamut ug gibutang diha sa iyaha. Samtang kining tawhana dili pa unta angayan sa iyang kamatayon para imong

puli, ikaw ang gihatagan sa kagawasan. Ikaw maoy gitugotan aron mabuhi—bisan pa ikaw maoy masalaypon—tungud kay usa ka nilalang ang mitubus sa imong silot.

GIKAN SA KAMATAYON NGADTO SA KINABUHI

Ang matag tawhanong binuhat nahimugso nga hinukman ubus sa silot nga kamatayon. Pero ang Dios mihimo niini aron posibleng makalikay sa dangatan. Siya mitanyag kanimo sa kagawasan ug kinabuhing walay-katapusan uban ang Iyang-kaugalingon isip usa ka grasyosong gasa.

Ang Dios nga Amahan mipadala sa Iyang Anak, si Jesu-Kristo, aron maoy imong halili ug nagpagawasnon kanimo gikan sa silot nga kamatayon. Ang Bibliya, ang Diosnong nahisulat nga pulong, nag-ingon:

“Kay gihigugma gayud sa Dios ang kalibutan, nga Siya mihatag sa Iyang bugtong gipanamkon

nga [talagsaong pagkatawo] Anak, nga ang si bisan kinsa nga mutoo diha Kaniya dili gayud malaglag, apan adunay kinabuhing walay-katapusan. Kay ang Dios wala gipadala ang Anak nganhi sa kalibutan aron hukman ang kalibutan; apan aron ang kalibutan mahimong maluwas pinaagi Kaniya. Siya nga mutoo diha Kaniya maoy dili hinukman; siya nga wala mutoo hinukman nang daan, tungud kay siya wala man mitoo diha sa ngalan sa bugtong gipanamkon nga [talagsaong pagkatawo] Anak sa Dios.” (Juan 3:16-18)

Kay ikaw masalaypon, walay-mahimo aron luwason ang imong-kaugalingon gikan niining silot sa kamatayon. Walay abilidad nga imong gihuptan o bisan unsang binuhatan nga imong pwedeng mabuhat aron matubus ang imong-kaugalingon. Apan ang Dios mihatag sa usa ka ikyasanan gikan sa walay-katapusang silot. Ang presyo para

sa imong kagawasan gibayaran na sa imong halili, si Jesu-Kristo, sa dihang Siya namatay didto sa krus. Ikaw makadawat sa Diosnong grasyahanong gasa sa kinabuhing walay-katapusan pinaagi sa usa ka yanong buhat sa pagtoo.

“Too diha kang Ginoong Jesus, ug ikaw maluwas.” (Mga Buhat 16:31a)

Pagtoo diha ni Kristo nagpasabut nga imong dawaton isip tinuud ang kamatuuran nga Siya namatay isip imong personal nga halili. Sa higayon nga ikaw mutoo ikaw gideklara nga inosente ug ang imong silot sa kamatayon matangtang. Ang Dios muhatag kanimo sa kinabuhing walay-katapusan ug mugarantiya sa imong kaluwasan. Dihadiha dayon, ikaw dad-on ngadto sa usa ka walay-katapusang pakigrelasyon uban sa Dios.

NAHIMULAG GIKAN SA DIOS

Hangtod karong panahona siguro wala ka pa masayud nga ikaw nahimugso ubus sa usa ka sentensiya sa kamatayon. Siguro ikaw nagtoo sa imong-kaugalingon nga sama sa usa ka ‘maayong tawo,’ ug ang imong pamati nga ang Dios *dili gayud* musilot kanimo. Apan ikaw masalaypon, ang Dios magasilot kanimo, ug bugtong si Kristo lamang ang makaluwas kanimo. Diha kang Kristo mismo nga mga pulong ang mensahe sa Ebanghelyo mao:

“Ako mao ang dalan, ug ang kamatuuran, ug ang kinabuhi; walay bisan usa nga makaadto sa Amahan, apan pinaagi Kanako.”
(Juan 14:6b)

Sa higayon nga ikaw gipakatawo, usa ka ali ang anaa na tali kanimo ug sa Dios. Kini nga ali maoy mipahimulag sa tawo gikan sa Dios. Tungud kay ang Dios hingpit man sa tanang pamaagi, ang Iyang mga sukdanan

hingpit usab. Ang Dios dili makadawat o mutugot kanimo tungud kay ikaw dili man hingpit.

Isip kini maoy nahisulat, “Walay matarong, wala bisan usa.” (Mga Taga-Roma 3:10)

Ang Bibliya nag-ingon kanato nga ang tawo dili perpekto. Ikaw isip usa ka tawhanong binuhat gipanganak nga depektoso uban sa usa ka kinaiyang makasasala nga maoy mutintal kanimo aron makahimo sa mga kalapasan batok sa Dios. Isip usa ka resulta, ang imong napanunud nga kinaiyang makasasala maoy hinungdan niini nga imposibli para kanimo, pinaagi sa imong kaugalingong mga paningkamut, aron nga dawaton sa Dios.

Busa, maingon nga pinaagi sa usa ka tawo [Adan] ang sala nakasulud diha sa kalibutan, ug ang kamatayon pinaagi sa sala, ug busa ang kamatayon mikuyanap ngadto

sa tanang mga katawhan, tungud kay ang tanan nakasala man. (Mga Taga-Roma 5:12)

Kay ang tanan kanato mamahimong maingon sa usa nga mahugaw, ug ang tanan nga atong matarong nga mga binuhatan maingon sa usa ka mahugaw nga saput. (Isaias 64:6a)

Kon ikaw matinud-anon diha sa imong-kaugalingon, ikaw muangkon nga ikaw nakasala. Apan ang imoha sigurong wala mamatnguni mao nga ang tentasyon aron makasala nagsugod gikan sa imong dala-pagkatawo nga depektosong kinaiyahan. Ug tungud niini nga kinaiyang makasasala ikaw dili gayud makaabut sa mga sukdanan sa Dios.

Sanglit ang tanan nakasala man ug nakabsan sa himaya sa Dios. (Mga Taga-Roma 3:23)

Ang atong masaypanong kinaiyahan

maoy nakapahimulag kanato gikan sa Dios. Wala gayuy 'maayo' nga mga katawhan diha sa Diosnong mga sukdanan. Walay bisan usa nga may ensaktong 'kamaayo' pinaagi sa iyahang kaugalingong tinguha o mga binuhatan aron sa pagtangtang niining ali nga nakapahimulag sa tawo ngadto sa Dios. Ang dili-perpektong tawo nahimutang sa usa ka bahin sa ali ug ang perpektong Dios anaa sa pikas.

NATANGGONG DIHA SA MERKADO SA ULIPON

Ang Bibliya mihingalan sa tawhanong bahin sa ali og merkado sa ulipon. Kita mga ulipon sa atong kaugalingong dunut, makasasalang kinaiyahan. Ang mga ulipon dili gayud makatubus sa ilang kaugalingon o makapalit para sa ilang kaugalingong kagawasan. Matag usa ka binuhat *natawo* diha sa merkado sa ulipon. Si Kristo miingon,

“Sa pagkatinuud, sa pagkatinuud, Ako muingon diha kanimo, nga ang matag usa kinsa makahimog sala mao ang ulipon sa sala.” (Juan 8:34)

Sa sulud sa merkado sa ulipon, didto walay kaugmaon. Ang kabilin sa atong pagkaulipon mao ang silot, walay-katapusang pagkahimulag, ug ang pagkastigo gikan sa Dios. Bisan pa ang tawo gipanganak ubus sa silot sa kamatayon, ang grasya sa Dios nagahatag sa usa ka pamaagi sa pag-escape. Ang grasya maoy usa ka butang nga ikaw dili makabuhat. Tungud sa Iyang perpektong gugma, ang Dios mitanyag sa matag tawhanong binuhat sa usa ka kapilian tali sa kamatayon ug kinabuhing walay-katapusan.

Kay ang bayad sa sala mao ang kamatayon, apan ang walay bayad nga gasa gikan sa Dios mao ang kinabuhing walay-katapusan diha kang Kristo Jesus nga atong Ginoo. (Mga Taga-Roma 6:23)

Ang Dios dili gayud mubiya kanimo ngadto sa merkado sa ulipon sa sala. Siya nagasangkap sa tanan para kanimo ug sa matag usa ka tawhanong binuhat aron kita makabiya sa pagkaulipon ug makasulud diha sa walay-katapusang pakigrelasyon uban Kaniya.

ANG ALI NATANGTANG

Aron mamahimong gawasnon kita gikan sa merkado sa ulipon sa sala, ang Dios nagplano og pamaagi aron diin ang Iyang perpektong mga sukdanan mahimong maabut. Ang Dios Amahan mipadala sa Iyang Anak, si Jesu-Kristo, aron sa pagtangtang sa ali tali sa Dios ug sa tawo.

Si Jesu-Kristo maoy walay-tumbas tungud kay Siya perpektong Dios ug perpektong tawo. Dili lamang si Jesu-Kristo tawo, apan Siya usab Dios pareha ra usab sa Amahan nga mao ang nagpadala Kaniya: “Ako ug ang Amahan usa ra” (Juan 10:30).

Sa dihang si Jesu-Kristo mianhi sa kalibutan para mahimong Dios-tawo, Siya natawo gawas sa merkado sa mga ulipon: Ang Iyang pagkatawhanon perpekto. Tungud sa Iyang pagkawalay-tumbas nga pagkahimugso, Siya ang bugtong walay kinaiyang makasasala. Siya wala gayud makahimo og usa ka sala sa Iyang-kaugalingon, ug walay balaanong pagsilot nga Iyang pagabayran. Bugtong si Kristo lamang ang may katakus sa Iyang kaugalingong merito aron makab-ot ang perpektong mga sukdanan sa Dios. Bugtong si Kristo lamang ang makapalit sa atong kagawasan tungud kay Siya gawasnon gikan sa sala ug gawas sa merkado sa ulipon. Ang Dios Amahan isip maoy Kinatas-ang Huwes midawat Kaniya isip imong halili.

Isip mao ray bugtong perpektong tawo sa kasaysayan, si Jesu-Kristo mipili nga maoy pagahukman didto sa krus para sa tawhanong mga sala.

Siya [ang Dios] mihimo Kaniya

[Kristo] kinsa nasayud nga walay sala aron mahimong sala para sa atong katungud, aron kita basin ra mamahimong pagkamatarong sa Dios diha Kaniya. (2 Mga Taga-Corinto 5:21)

Iyang gibayaran ang silot sa kamatayon didto sa krus para kanimo ug sa tagsatagsa nga tawhanong binuhat. Ang matag sala nga sukad nabuhat—kaniadto, karon, ug sa umaabut—gihukman didto sa krus. Ang Dios Amahan militok sa sentensya ug si Jesu-Kristo misunud niini.

Ug sa nakit-an diha sa panagway sama sa usa ka tawo, Siya mipaubus sa Iyang kaugalingon pinaagi sa paghimong masinugtanon hangtod sa punto sa kamatayon, bisan pa sa kamatayon didto sa krus. (Mga Taga-Filipos 2:8)

Pinaagi sa pagdawat sa imong silot, si Jesu-Kristo nahimong imong halili. Isip imong

halili, Iyang nakab-ot ang perpektong mga sukdanan sa Dios para kanimo ug gitangtang ang ali tali kanimo ug sa Dios.

ANG MERKADO SA ULIPON

NAABLI

Si Jesu-Kristo mitangtang sa mga kadena gikan sa merkado sa ulipon. Ikaw gawasnon aron mubiya. Ikaw karon aduna nay agianan ngadto sa Dios. Ang tanang butang nga gikinahanglan aron sa pagtangtang sa ali tali kanimo ug sa Dios nahuman na ang katumanan.

Kay adunay usa ra ka Dios, ug usa ka tigpataliwala usab tali sa Dios ug sa mga tawo, ang tawo nga si Kristo Jesus, kinsa mihatag sa Iyang-kaugalingon isip lukat alang sa tanan. (1 Timoteo 2:5-6a)

Si Jesu-Kristo maandamong midawat sa silot sa kamatayon isip halili kanimo. Ikaw

gawasnon na! Ikaw dili na usa ka binilanggo sa merkado sa ulipon.

Unsaon man nimo pag-eskapo gikan sa merkado sa ulipon? Wala kay kinahanglang *buhaton* o *masulti* o *mausab* aron mahimong gawasnon. Ikaw anaa nay agianan sa kagawasan. Pagtoo mao ang bugtong gikinahanglan. Pagtoo mao ang yanong nagatoo. Ang Dios walay gikinahanglan gikan kanimo gawas sa pagtoo. Bugti niini, Siya muhatag sa kinabuhing walay-katapusan. Imong gidawat pinaagi sa pagtoo ang gasa nga Iyang gitanyag.

Apan sama gidaghanon sa midawat Kaniya, ngadto kanila Siya mihatag sa gahum aron mamahimong mga anak sa Dios, apil pa niadtong kinsa mitoo sa Iyang ngalan. (Juan 1:12)

GRASYA UG PAGTOO

Ang imong kaugalingong bili dili maoy isyu ngadto sa Dios. Walay bisan usa nga

makaabut sa Iyang mga sukdanan. Ang imong kaugalingong mga sala dili usa ka isyu sa Dios. Iyaha nang nahuman ang bista ug nasirado ang kaso sa tawhanong sala. Ang imong 'maayong mga binuhatan' ug mga buhat dili usa ka isyu sa Dios. Siya mitanyag sa kaluwasan tungud sa grasya pinaagi sa pagtoo, dili pinaagi sa mga buhat.

Kay tungud sa grasya kamo nangaluwas pinaagi sa pagtoo; ug kini dili sa inyong mga kaugalingon, kini mao ang gasa sa Dios; dili isip usa ka resulta sa mga binuhatan, aron walay bisan usa ang makapasigarbo. (Mga Taga-Efeso 2:8-9)

Ang Diosnong palisiya mao ang kaluwasan tungud sa grasya pinaagi sa pagtoo. Si Jesu-Kristo ang naghatag sa imong kaluwasan. Ang pagtoo diha ni Kristo mao ang pamaagi aron ikaw makadawat sa grasya sa Dios.

UNSAON ARON MALUWAS

Ang pagtoo, lamang, mao ang yawi sa imong kaluwasan. Si Jesu-Kristo ang mihimo nimong gawasnon ug kini nagpasabut nga ikaw gibuhian aron makahimo sa imong kaugalingong kabubut-on mahitungud Kaniya. Ikaw adunay katungud aron mudesider kun para o batok ni Kristo.

Siya nga mutoo diha sa Anak may kinabuhing walay-katapusan; apan Siya nga dili mutoo sa Anak dili makakita sa kinabuhi, apan ang kapungut sa Dios magapabilin diha kaniya. (Juan 3:36)

Bisan pa sa imong pinaka maayohan, ikaw dili gayud makakab-ot o angayan sa usa ka pakigrelasyon diha sa Dios. Kadto lamang hingtungdan sa imong pagtoo, si Jesu-Kristo, ang adunay merito. Ang imong pagtoo sa gibuhat ni Kristo didto sa krus maoy nagbuhat sa atong kaluwasan nga mahimong posibli. Ang pagtoo mao ang yano

nimong desisyon aron mudawat sa mensahe ni Kristo isip tinuud. Ang pagtoo lamang diha ni Kristo lamang ang kaluwasan.

Ikaw mutubag sa Dios nga Amahan pinaagi sa simpleng pagporma sa mga pulong sa pribado diha sa imong hunahuna, ako mitoo diha ni Kristo. Ikaw naluwas sa higayon nga mutoo. Ang Dios muhatag kanimo sa kinabuhing walay-katapusan. Ikaw “gipanganak pag-usab.”

“Gawas kon ang usa ka tawo gipanganak pag-usab, siya dili makakita sa gingharian sa Dios.”
(Juan 3:3b)

“Siya kinsa nakadungog sa Akong pulong, ug mutoo Kaniya kinsa mipadala Kanako, adunay kinabuhing walay-katapusan, ug dili pagahukman, apan gilabyan ang kamatayon ngadto sa kinabuhi.”
(Juan 5:24)

KINABUHI O KAMATAYON

Ang imong desisyon mahitungud ni Kristo maoy pinaka importanteng desisyon sa imong kinabuhi. Ikaw ang mupili sa imong kaugalingong walay-katapusang kaugmaon. Kon ikaw dili mutoo, ikaw magpabiling anaa sa gawas sa Diosnong pamilya ug dili gayud makaambit sa Iyang walay-katapusang kinabuhi.

“Ako mao ang pagkabanhaw ug ang kinabuhi; siya kinsa mutoo Kanako mabuhi bisan kon siya mamatay, ug ang matag usa nga mabuhi ug mutoo Kanako dili gayud mamatay.”
(Juan 11:25-26a)

Ang imong ngalan pagapalaon sa libro sa kinabuhi kun ikaw mamatay nga nagpabiling walay pagtoo ni Jesu-Kristo. Ikaw magabarog atubangan sa Kinatas-ang Korte sa Langit aron pagahukman ug pagasilotan. Ang si bisan kinsang pangalan nga mawala gikan niining libro ang pagahukman aron mupuyo didto sa linaw nga kalayo sa kahangturan.

Ug kon ang si bisan kinsang pangalan ang dili makaplagn nga nahisulat diha sa libro sa kinabuhi, siya itambog ngadto sa linaw nga kalayo. (Pinadayag 20:15)

Walay eternal nga pagsilot para sa magtotoo. Angsilotsa kamatayon natangtang na.

Busa karon wala nay paghukum para niadtong kinsa anaa diha ni Kristo Jesus. Kay ang balaod sa Espiritu sa kinabuhi diha ni Kristo Jesus ang naghimo kanimong gawasnon gikan sa balaod sa sala ug sa kamatayon. (Mga Taga-Roma 8:1-2)

Para niadtong mitoo diha ni Jesu-Kristo, ang Dios mitanyag sa usa ka kinabuhing may kahulugan, katuyoan, ug kapadulngan.

KINABUHI DIHA SA DIOSNONG PAMILYA

Kon ikaw mutoo diha ni Kristo, ikaw musulud diha sa usa ka bag-o ug personal nga pakigrelasyon uban sa Dios. Ikaw anaa sa Iyang pamilya. Ang matag magtotoo maoy Diosnong anak ug sa kanunay magpabilin.

Kay kamong tanan mga anak sa Dios pinaagi sa pagtoo diha ni Kristo Jesus. (Mga Taga-Galacia 3:26)

Ang imong bag-ong kahimtang isip usa ka magtotoo wala kini magpasabut nga ikaw karon perpekto. Ikaw sa gihapon naghuput sa imong kinaiyang makasasala, ug magapadayon sa pagpakasala ug makahimo sa mga kasaypanan. Diha sa usa ka pamilya, daghan sa mga kabataan siguro ang mahimong maayo ug daghan usab ang dili. Ug busa mao usab kini sa mga magtotoo. Ang tanang mga magtotoo mapakyas man, og ang pipila mas daghan kaysa uban. Pero ang Dios dili musalikway ni si bisan kinsa sa

Iyang mga anak. Dili igsapayan kun kanunay o unsa kadaotan ang imong kasaypanan isip usa ka magtotoo, ang imong pagkabutang aduna nay kasigurohan uban sa Dios nga dili gayud matapos.

Ug Ako muhatag sa kinabuhing walay-katapusan ngadto kanila, ug sila dili gayud malaglag; ug walay bisan usa ang makaagaw nila gikan sa Akong kamut. (Juan 10:28)

Ang imong bag-ong pakigrelasyon uban sa Dios permanente ug walay-katapusan. Ang imong kaluwasan dili na mahanaw sa higayon nga ikaw mutoo ni Kristo. Imong gibiyaan na ang merkado sa ulipon sa kahangturan ug ikaw adunay hingpit nga siguridad: ang Diosnong walay kondisyong saad sa walay-katapusang kinabuhi.

Ang Diosnong kahingpitan maoy imong garantiya. Siya makanunayong nahigugma kanimo. Siya dili gayud mulis sa Iyang mga sukdanan o muusab sa usa ka saad nga Iyang pagabuhaton diha kanimo. Ang ali

nahanaw na sa kahangturan! Wala na gayuy makapahimulag pa og utro kanimo isip usa ka magtotoo nga gikan sa Dios. Wala na gayuy makaagaw sa imong walay-katapusang kaluwasan.

Kay ako nakumbinsi nga walay kamatayon, ni kinabuhi, ni mga anghel, ni mga punoan, ni mga butang pagkakaran, ni mga butang nga umaabut, ni mga gahum, ni gihabugon, ni gilagmon, ni bisan unsang laing binuhat nga butang, nga sarang makapahimulag kanato gikan sa gugma sa Dios, nga anaa kang Kristo Jesus nga atong Ginoo. (Mga Taga-Roma 8:38-39)

HUMAN SA KALUWASAN, UNSA MAN?

Isip usa ka bag-ong magtotoo, ikaw misulud diha sa usa ka bag-ong kinabuhi. Ikaw karon aduna nay usa ka *permanenteng*

panagtipon uban sa Dios Amahan ug ang Iyang Anak, si Jesu-Kristo. Ikaw usa ka Kristohanon.

Busa kon si bisan kinsang tawo ang anaa kang Kristo, siya usa ka bag-o nga binuhat; ang daang mga butang mitaliwan na; tan-awa, ang bag-ong mga butang miabut na. (2 Mga Taga-Corinto 5:17)

Isip usa ka bag-ong magtotoo, ikaw dihadiha dayon magsugod pagdawat sa balaanong suporta. Ang Dios sa kanunay magsangkap para kanimo—pareha ang karon, samtang ikaw ania pa sa kalibutan, ug human ka mamatay, sa higayon nga ikaw magpuyo uban Kaniya sa kahangturan didto sa langit.

Ang akong Dios magahatag sa tanan ninyong mga kinahanglanon sumala sa mga bahandi sa Iyang himaya diha kang Kristo Jesus. (Mga Taga-Filipos 4:19)

Dalaygon ang Dios ug Amahan sa atong Ginoong Jesu-Kristo, nga nagapanalangin kanato uban ang matag espirituhanong panalangin diha sa langitnong mga dapit diha ni Kristo. (Mga Taga-Efeso 1:3)

Bisan sa higayon nga ikaw makasala, ang Diosnong grasya magsangkap sa usa ka pamaagi para kanimo aron mahiuyon sa imong dalan ug mupadayon sa pagtuman sa Iyang plano. Sa yanong giasoy:

Kon isugid ta [hinganlan] ang atong mga sala [sa Dios nga Amahan], Siya matinumanon ug matarong sa pagpasaylo kanato sa atong [nahibaloan] mga sala ug sa paghinlo kanato gikan sa tanang [wala mahibaloi ug nahikalimtan na nga mga sala] dili-pagkamatarong. (1 Juan 1:9)

Busa, sa higayon sa imong kaluwasan, ikaw adunay mga kabtangan nga

gikinahanglan aron sa pagpuyo sa Kristohanong pamaagi sa kinabuhi. Ikaw makasabut sa Diosnong plano para sa imong kinabuhi pinaagi sa pagkat-on sa doktrina sa Bibliya nga nagagikan sa usa ka pastor-magtutudlo. Ang Bibliya, diin mao “ang hunahuna ni Kristo” (1 Mga Taga-Corinto 2:16), mao ang Diosnong paggiya para sa imong bag-ong kinabuhi.

Ang Dios nagahatag og mga pastor aron tin-aw ug tukma ang pagtudlo sa Iyang Pulong diha kanimo—kon ikaw adunay usa ka tinguha aron makat-on. Ang labing importante mao ang pagpaminaw kanunay ug pagtutuk sa unsay gisulti sa Bibliya. Pinaagi sa pagkat-on, paghunahuna, ug paggamit sa doktrina sa Bibliya, ikaw mutubo espirituhanon diha sa imong bag-ong kinabuhi. Ang espirituhanong pagtubo human sa kaluwasan, og ang Kristohanong maayong mga buhat, mahitabo lamang kini isip usa ka resulta sa pagkat-on ug paggamit sa Pulong sa Dios.

ANG IMONG WALAY KATAPUSANG MGA ALTERNATIBO

Ang eternidad usa ka hataas, hataas nga panahon. Kun itandi sa eternidad, ang panahon nahisama ra sa usa ka tulo sa usa ka baldeng tubig. Ang imong limitado nga hunahuna dili gayud makatugkad sa reyalidad sa panahon nga walay katapusan. Ikaw anaa lamang sa usa ka hamubo nga mga katuigan, tingali mas mubo pa kay sa imong gihunahuna, aron sa pag-andam sa kinabuhi human sa kamatayon. Ang imong kinabuhi nagabitay lamang sa pinakapino nga tanud.

Sa higayon nga ikaw mutoo diha ni Kristo, ikaw makapaabut sa

usa ka kabilin nga dili madunut ug dili mabuling ug dili mahanaw, gitipigan didto sa langit alang kanimo.

(1 Pedro 1:4)

Ang Bibliya mipakita lamang og diyutay

mahitungud sa langit, pero mihatag og paglaum kanato nga kini usa ka mahimayaon gayud labaw pa sa atong imahinasyon:

Ug Iyang pagapahiran ang matag luha gikan sa ilang mga mata; ug wala na gayud ang bisan unsang kamatayon; ug wala na usab unyay pagminatay, o paghilak, o kasakit. (Pinadayag 21:4a)

Ang labing makapahikugang sa tanan, imong makita si Kristo kinsa mao

ang silaw sa Iyang [sa Dios nga Amahan] himaya ug ang tukmang representasyon sa Iyang kinaiya. (Mga Hebreohanon 1:3a)

Karon kon ikaw magdumili aron sa paghimo niining pinakadako ug pinaka importanteng desisyon, ikaw nagpili sa usa ka walay-katapusang makalilisang nga damgo. Ang mutamay sa Usa kinsa nahiagom sa wala-isulting paghingutas didto sa krus isip

imong halili aduna kini makapakugang nga mga sangputanan.

Ang alternatibo mao ang linaw nga kalayo, ang katapusang destinasyon sa demonyo ug sa iyang mga anghel (Mateo 25:41). Kini nga dapit sa walay-katapusang pag-antos ug kangutngut nagbilanggo sa walay-katapusang kapanahonan sa tanan nga mibalibad sa gitanyag sa Dios nga kagawasan gikan sa merkado sa ulipon sa sala. Pasiplati kining pag-antos ug walay paglaum para sa mga dili-magtotoo:

Ug didto pagasakiton sila sa adlaw ug sa gabii hangtod sa kahangturan.
(Pinadayag 20:10b)

Ug kon ang ngalan ni bisan kinsa dili makaplagnan nga nahisulat diha sa libro sa kinabuhi, siya itambog ngadto sa linaw nga kalayo.
(Pinadayag 20:15)

IMOHA RA GAYUD ANG PAGPILI

Kon ikaw wala pa makahimo sa usa ka desisyon kabahin sa imong walay katapusang kaugmaon, wala si Kristo kanimo, walay paglaum, ug walay kinabuhing walay katapusan. Ikaw masaypanon, destinado ngadto sa linaw nga kalayo. Apan, si Jesu-Kristo sa Iyang *kaugalingon* naghunahuna kanimo sa dihang miadto Siya sa krus. Si Kristo maoy mihalili sa imong dapit ug midawat sa imong silot. Siya namatay isip imong halili.

Ang Dios nagpadayag sa Iyang gugma alang kanato pinaagi niini nga bisan sa mga makasasala pa kita si Kristo nagpakamatay isip usa ka halili para kanato. (Mga Taga-Roma 5:8)

Ang Dios mihatag kanimo sa kagawasan aron muhimo sa imong kaugalingong pagpili kabahin ni Jesu-Kristo. Karong taknaa, karong higayona, pinaagi sa usa ka yanong

buhat sa pagtoo ikaw makaangkon sa kinabuhing walay-katapusan.

“Siya mihatag sa Iyang bugtong gipanamkon nga [talagsaong pagkatawo] Anak, nga ang si bisan kinsa nga mutoo diha Kaniya dili gayud malaglag, apan adunay kinabuhing walay-katapusan.” (Juan 3:16b)

Kini ang imong oportunidad aron sa pagdawat sa Diosnong gasa diha kanimo. Ang imong pagpili ni Kristo usa ka pribadong desisyon. Walay bisan usa ang makahimo sa maong desisyon para kanimo. Ug walay tawo ang may katungud nga mupugus kanimo aron sa paghimo sa bisan unsang desisyon. Ikaw ang kinahanglang mudesisyon para sa imong kaugalingon. Diha sa praybasiya sa imong kaugalingong kalag, ikaw makahimo sa yanong pagsulti sa Dios nga Amahan nga ikaw nagatoo ni Ginoong Jesu-Kristo. Dihadiha dayon, ang imong walay-katapusang kaugmaon masiguro gayud.

Kon ikaw modesider aron sa pagtoo ni Kristo, ikaw masaligon gayud nga makabaton sa kinabuhing dayon. Ikaw makaambit sa walay-katapusang pakigrelasyon uban sa Dios. Ikaw magpuyo uban Kaniya didto sa langit sa kahangturan. Pagtoo lamang ni Kristo lamang *mao* ang kaluwasan!

Imoha ra gayud ang pagpili.

DOKTRINAL NGA MGA PAGTOON SA BIBLIYA

Doktrina sa Bibliya, ang unud sa pagtudlo nga gikuha gikan sa literal nga interpretasyon sa Kasulatan, mao ang sukdanan para sa espirituhanong kamatuuran. Ang pagtoon sa Bibliya maghatag sa espirituhanong pampabaskog para sa Kristohanon (Mateo 4:4).

Ang pagkamahinungdanon sa doktrina sa Bibliya pagahatagan gayud og importansiya (Mga Salmo 138:2). Ang Dios misugo sa Kristohanon sa pag-usab sa hunahuna (Mga Taga-Roma 12:2). Kini nga pagkausab nanginahanglan ug kada adlaw nga pagbag-o sa panghunahuna pinaagi sa pagkat-on ug paggamit sa Pulong sa Dios (2 Mga Taga-Corinto 4:16; Mga Taga-Efeso 4:23).

Sa daghan nang mga katuigan ang doktrinal nga mga klase sa Bibliya nga gitudlo ni R.B. Thieme, Jr., nakahatag sa kadaadlaw nga espirituhanong pagkaon para sa iyang kongregasyon. Mga libro, DVDs, ug MP3 CDs kini abilabol nga walay bayad o obligasyon. Ang Katalogo sa Doktrinal nga mga Pagtoon sa Bibliya ipanghatag basi sa inyong hangyo.

R.B. THIEME, JR., BIBLE MINISTRIES

P.O. Box 460829
HOUSTON, TEXAS 77056-8829
www.rbthieme.org

PALISIYA SA PINANSIYAL

Wala gayuy bayad para sa bisan unsang materyales nga gikan sa R. B. Thieme, Jr., Bible Ministries. Si kinsa kadtong mahiligon sa pagkat-on sa Bibliya, makaangkon sa among DVDs, MP3 CDs, ug mga mantalaan nga walay bayad. Ang Dios mao ang naghatag sa doktrina sa Bibliya. Tinguha namo nga mapakita ang Iyang grasya.

R.B. Thieme, Jr., Bible Ministries maoy usa ka ministeryo sa grasya ug kinatibuk-ang gipadagan sa boluntaryong kontribusyong. Walay listahan sa presyo sa bisan unsa namong mga materyales. Walay salapi nga gipangayo. Kanus-a diin ang pagkamapasalamaton sa Pulong sa Dios maoy naghatag og kagana sa usa ka magtotoo nga muhatag, aduna siyay katungud sa paghatag og kontribusyong para sa pagpakaylap sa doktrina sa Bibliya.

ANG TAGSULAT

Si ROBERT B. THIEME, JR., (1918-2009), nagpabiling makahuluganong tingog sa Kristiyanismo sa tibuuk kalibutan. Ang iyang makugihon, mapatin-awong pagtudlo gibasi sa orihinal nga lengguwahe sa Kasulatan inubanan sa paglandag sa makasaysayong konteksto sa panahon nga gisulat ang Bibliya. Ang iyang modernong sistema sa bokabularyo, ilustrasyon, ug mga kategoriya Biblikal nagpatin-aw sa pagtudlo sa dili masayup nga mga kamatuuran sa Diosnong Pulong. Si Thieme nakarekord og kapin pa sa napulog-usa ka libo ka mga oras nga mga pagtudlo ug nakamantala og kapin pa sa usa ka gatos ka mga libro ug nga hapit nakalukup og tuki sa Bibliya.

Si Thieme nakatapos didto sa University of Arizona (Phi Beta Kappa) ug Dallas Theological Seminary (summa cum laude). Ang iyang pagtungha sa seminaryo nahunong tungud sa pagpangalagad militar sa Ikaduhang Gubat sa Kalibutan diin misaka siya sa ranggo nga lieutenant colonel sa Kwerpo sa Kasundalohan sa Kahanginan sa Estados Unidos. Human natapos sa iyang padayon nga pagtungha niadtong 1950, siya nahimong pastor-magtutudlo sa Simbahan sa Berachah sa Houston, Texas. Ang iyang nilukup ug gipalapdan nga pagtoon sa Griyego, Hebreyo, teyolohiya, kasaysayan, ug *textual criticism* naghatag og pundasyon sa iyang masuknaong pagtoon ug pagtudlo sa Pulong sa Dios. Si Thieme miluwat sa pagkapastor-magtutudlo sa Simbahan sa Berachah human sa singkwentay tres katuig nga matinud-anong pagpangalagad.

